

IROQUETICA ITIONCAQUECA

JOANCA

Antsatantaquemparoca

Ocatica iroguenti antsatantaquemparoca iroquetica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguete pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatica paperi ichooaquegueti Epesoqui, atsajiaquetari iriguenti quempoguijajiguirica quemisantajiatsica Epesoquitica. Iquenquejajitaque arica itioncajiaqueneri quemisantajiatsica quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarensi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncacotaqueri acaniqui caquinteja tsatacaantajiavetacaroca teeca iroomajateji, icantajiavetaca, “Jesoshi teequea irio irijanite Aapani Irioshi”. Irootaque itioncantajiacanarica quemisantajiatsica cameetsaniji intsajiaque arimaja Jesoshi iriguenti Irijanite Aapani Irioshi, cameetsaniji irishinevaejiaquempa iquemisantajiaquerigueti Jesoshi, aisa intsajiaqueniji maasano aventajiacarica arimaja ipeacotsijajari iguempvaerejia, incoguitempani intsipajiaquempani jenoqui inquitequi (1.1-4; 2.18–3.3; 4.1-6; 5.1-15). Itsatacaajiaqueri Joanca jero anaamajatanquitsica: ampintsamajajiaquempani Aapani Irioshi aisa ampintsajiaquempani apitsaroveritarijateni aisa maasano caquinteja (2.9-17; 3.11-24; 4.7-21). Itsatacaajiaqueri aisa quero incojiaquempani quemisantajiatsica arigueti inquempevaetaquempa (1.5–2.8; 3.4-10; 5.16-21).

Quirishito iriguenti Anijacaantantatsica

1 ¹Imaica nontioncajiaquempani nontsavetanqueri igantagaca choocatanquitsica coramani iroaquera-guete tequerataguete onchoocatomateji,

noquemajiaqueritarite ariqueate namenajiaqueri aisa nopamijiaqueri-queate. Iriguentitarite Quenquetsatsarensi Anijacaantantatsica. ²Iriratica Anijagantsi, yonigaantaca, namenajia-queri notsavetacotantajiacaricaqueate,

iriguentitarite anijacaajiacajineca ancoguitempaninijite anchoocajiaque Aapaniqui Irioshiqui. Manaqueate ichoocavetaca Aapaniqui cotanquitsi ariqueate icoraquequiti yonigaajiaquena. ³Iriotaque notsavetacojiaque iriraquea namenamajajiaqueca aisa noquemamajajiaqueca. Nocamantantajiaquempica cameetsanijite pintsipashirentimentajiaquenanjite pinquejejiacarenanjite naatimpa notspashirentajiacarigueti Aapani Irioshi jeri aisa Irijanite, irira Jesoquirishito. ⁴Notioncaciaquempi cameetsanijite pishinemajajianaquempanijite.

Aapani Irioshi iriguenti Tsirencarimajaca

⁵Iroguenti nocamantajiaquempica itsatacaajiaquenaca Jesoquirishito icanquegueti irira Aapani Irioshi iriguenti Tsirencari, teequeate impitsecoteji, teenicate inquempevaetimatempaji, irootaque icantantajitacarica Tsirencari. ⁶Ancantajiguegueti atsipamajajajari Aapani Irioshi cotanquitsiqueate agantagatirajagueti aquempevaejiga manaqueate amataajiacajaca intati, teenicate antajigueroji cameetsaguetatsica, quejecaqueate manaca apitsecacojiaque intati. ⁷Cotanquitsiqueate ancomajamajajiaquempagueti quejetaca aquenanaque tsirencaguiteri, anquempejiaquemparigueti Aapani Irioshi icomajamajatagueti, ariqueate atsipashirentavacaajiacajaca, ishejirojiritarite maasano aguempavearejia, ishetantajajiro iriraja Jesoshi Irijanite.

⁸Ancantajiguegueti: “Tee nonquempevaetempaji”, aroguentiqueate amatavijajatsi, aisa tequerata antsamajateroji iroomajatsica. ⁹Cotanquitsiqueate ancamantajiaquerigueti Aapani Irioshi antajiaquerogueti teeca oncameetsateji, iriatimpa impeacojiajajiro, irishetajajiro

roqueate maasano, icancanitarite inetsanatiro icanqueca, teenicate iramatavijanteji icameetsamajatarite. ¹⁰Oraqueate ancantajiguegueti: “Tee nonquempevaetempaji”, quejetacaqueate manaca acantajiaque Aapani Irioshi iriguenti tsojenti, teequeate anquemisantamajajigueroji icamantavetacajica.

2 ¹Napiguemisantarijateni, aviatiempajia quejetaquempi irijanijia, iroguenti notionquimentajiaquempi aatoniji piquempevaejiaja. Cotanquitsi antajiaquerogueti teeca oncameetsateji chooca quenquetsatacoventacajica quenquetsatacaquerica Aapani Irioshi. Irioquea Jesoquirishito teeca inquempevaetimatempaji. ²Apanirotarite iriatimpa metojaventajiacajica cameetsanijite irishetajajironijite Aapani Irioshi aguempavearejia aatonijite iquenquejacaajajiro coajica. Cotanquitsi teequeate apaniro irimetojaventero ashijia, imetojavenaquerogueate irashijia maasano caquinteguetatsica.

Anetsanajiaqueroca icantajiacajica Aapani Irioshi

³Oraqueate anetsanajiaquerogueti icantajiacajica Aapani Irioshi, irooqueate atsantajiacajaca arimaja atsaqueri. ⁴Choocagueti cantatsica: “Notsaqueri”, cotanquitsi aatogueti inetsanatiro icantajiacajica, iriguentiquea tsojenti, teequeate intsateroji iroomajaca. ⁵Arigueti anetsanamajajiaquero Iguenquetsatsare, arimaja aroguenti pintsamajajigarica, irooqueate atsantajiacajaca arimaja atsipamajajiacari. ⁶Ancantajiaquegueti atsipamajajiacari aquemisantajiaqueri, iintsija anquejejiacquempiqueate Jesoquirishito iriatimpa inetsanamajiaquerogueti maasano icanqueca Aapani Irioshi.

⁷Napiguemisantariteni, ocatica oca notioncaciaquempica teequeate iro

iroaqueraro quenquetsatsarentsi,
irogquentiquea paesatotica piquemajia-
queca coramani iroaqueragueti
piquemisanqueri Quirishito. ⁸Cotan-
quitsi quejetaca iro iroaqueraro. Amena-
querigueti Quirishito atsaque irooma-
jaca icantajiacajica, aisa iramenajita-
quempigueti intsajitaque iroomajaca.
Coramanitarite quejevaetaca apitsecaco-
jiaque, cotanquitsi imaica manaqueate
atsirencaguitetacojianaque intati.

⁹Chooagueti cantashitatsica: “Tsirencaguitetacotanaquena”, cotanquitsiqueate
igantagatirajagueti isemacari irapica-
quintete, manaqueate igantagatiraja
ipitsecacoti. ¹⁰Irraqueate pintsamajata-
rica irapicaquintete manaqueate
itsirencaguitetacotanaque, teenicate
onchoocatantajemparijiqueate taaca
opajitapae onquenatapojaquempaca
inquempevaetanquempaca. ¹¹Cotan-
quitsi iriraqueate semacarica irapica-
quintete quejetaca manaca ipitsecaco-
taque intati, irootaquequea teeca
intsatantempaji querocampate
incoquempani, oshamponcajatacaaque-
ritarite pitsecari.

**Iintsija ovashiantamajajianaquero
maasano teeca oncameetsateji**

¹²Irijanijia^a notioncantajiaquempica
ishejiaquempirotarite Aapani Irioshi
piguempevaerejia, aatoqueate iquenque-
jacaajimpro, piquemisantajiaqueritarite
Jesoquirishito. ¹³Irijanintajanquitsica,
notioncajiaquempiqueate pitsajiaqueri-
tari iriquetica choocatatsica coramani
tequeratagueti onchoocatimaguetjeji.
Notioncantajiaquempica aviatimpajia
iriaqueraca quenquevarijiananquitsica,
pagavejajiaqueritarite ampatsini.
Notioncantajiaquempica aviatimpajia

napiguemisantarijiateni quejejiaca
nirijanijiate, pitsajiaqueritarite Aapani
Irioshi. ¹⁴Notioncantajiaquempica
irijanintajiatetsica pitsajiaqueritarite
iriquetica choocatatsica coramani
tequeratagueti onchoocatimaguetjeji-
queate. Notioncantajiaquempica
aviatimpajia iriaqueraca quenquevariji-
ananquitsica pitampishitashijiaquerota-
rite maasano, aisa Iguenquetsatsare
Aapani Irioshi ohoocaguitaquetjeji,
jero aisa pagavejajiaqueri ampatsini.

¹⁵Aatoqueate pinintamajajigui pantaji-
guero yantapinijiguica quepatsiquitica
teeca intsarotentajiguempariji Aapani
Irioshi, aisa aatoqueate pinintamajaji-
guiro choocaguetatsica acaniqui
quepatsiqui. Quericaca nintamajatiroca
quejecaroca imaica, tee impintsatempa-
riji Aapani Irioshi. ¹⁶Teenicate irishine-
ventemparoji Aapani Irioshi ishineven-
tacaca antiroca teeca oncameetsateji.
Iriatimpajia manatarite iquenquejajia-
quero taaca opajitapae inintamajaji-
guica iriatimpajia, aisa inintajiaque-
queate irashintajiaquemparo maasano
yamenajiaqueca, jero aisa yaventacojiga
yashintajigarogueti. ¹⁷Oraqueate
quepatsi onteroncaguetanajempatarite,
aisa onteroncaguetanaquempa maasano
teeca oncameetsateji ishineventaca
caquinte, cotanquitsi iriraqueate
antamajajiguiroca inintaguetica Aapani
Irioshi incoguitempaniqueate inchooca-
guiteni.

Catsimajiguirica Quirishito

¹⁸Irijanijia, imaica pajini aguempa
incoraquetantajempaca Quirishito.
Aviatimpajia piquemacojiaqueri
incoraqueque catsimatarica, cotanquitsi
naatimpa nocantajiaquempi chooca

a 2.12 Iquenquevarivaetanaquegueti irira Joanca icantiri “irijani” maasano quemisantajiaque-
rica Amajirote Jesoquirishito.

imaica yoshequiaque catsimajiaquerica. Irootaquequeate antsatantajiaquempaca pajini aguempa incoraquetantajempaca Quirishito. ¹⁹Iriatimpajia manaqueate iconoajiavetacaji, cotanquitsi teequeate inquememajajigaji aatimpajia, teenicate inquemisantajigueriji Quirishito. Arimequeate inquememajajiacajime aatomequeate itsinampirejajijime, igantagamequeate intsipajiacajime, cotanquitsi itsinampirejajianacaji. Oquejetantacaca imaica cameetsanijite antsatimentajiaqueriniji tee inquejetaji aatimpajia iquemisantajiguigueti.

²⁰Cotanquitsi aviguentiquea itigarancajiaquempi Aapani Irioshi Ishire inchoocashirentajiaquempi, pitsatantajiacaroca Quenquetsatsarentsimajaca maasano aviatimpajia. ²¹Teequea mana nontioncajiguempiji namenajiaquempi tee pintsajigueroji. Iroguentiqueate notioncantajiaquempica namenajiaquempitarite pitsamajiaquero. Aisa pitsajigui iriraquea cantamajatsica teequeate iramataguempaji.

²²¿Queri tsojegatsica? Iriguenti cantatsica Jesoshi tee irio Quirishito Meshiantatsica. Iriguentisacanicate catsimataquerica Quirishito, teenicate inquemisanteriji iriatimpa aisa Iriri, mana icanque teequeate inchoocajigueji. ²³Quericaca tsojencaquerica Irijanite Irioshi tee intsateriji, aisa tee intsateriji Aapani Irioshi, cotanquitsi iriraquea cantamajatsica: “Jesoshi iriguenti Irijanite Aapani Irioshi”, iriotaque tsamajatarica, aisa itsamajaqueri Aapani Irioshi.

²⁴Pincoguitempanija pinquenquejajiaquero iroquetica piquemajiaque aatonijite pipeacojigaro. Picancanigueti pinquenquejajiaquero pintsipamajajiaquempiquea Aapani Irioshi aisa Irijanite. ²⁵Icantajiacajitarite ancoguitempani anchoocajiaque iriatimpaqui.

²⁶Imaica notioncacojiaqueri nintajiavetanquitsica iramatavijajiaquempime.

²⁷Cotanquitsi aviatimpajia ichoocashirentajiaquempi Ishire Aapani Irioshi itigarancajiaquempica Jesoshi, tee pincoguitempani intsatacaajiaquempica caquinte, maasanotarite itsatacaajiaquempi Ishire Aapani Irioshi. Iriatimpaqueate icantamajataque teequeate iramataguempaji, irootaquequeate imaica pincoguitempani pintsipamajiaquempari Quirishito pinetsanamajiaquero itsatacaajiaquempica Ishire Aapani Irioshi.

²⁸Imaicaquea, irijanijia, pintsipamajajiguempari Quirishito cameetsanijite pishineventimentajiaquemparinijite incoraquetajeguete. Pintsipamajajianaquempariguete aatoqueate apashiventa-caavajari coajica. ²⁹Pitsamajajiaqueriquea Jesoquirishito tee inquempevaetempaji, iriotarite comajamajatsica, iroosacanicate pintsajiaquequeate aisa maasano comajamajajatsica iriguenti ivoashirentica Quirishito.

Maasano comajamajajatsica iriguentijia irijanijiate Aapani Irioshi

3 ¹I Pamenajiguerija! Caaviji ipintsamajajiacajia Aapani Irioshi ipeacaantajiacajiacaqueate irijanijiate. Arimaja aroguentijia irijanijiate. Jeroqueate tecca intsatantajiacajica itsipajia quepatsiquitica, teequea intsajigueriji Aapani Irioshi. ²Napiguemisanterijiateni nopintsajiacaca, imaica aroguentijia irijanijiate Aapani Irioshi. Teequeate antsajigueji querocaca ancojianaquempiancoajica amenajiaquerigueti Jesoquirishito, iroguenti atsajiaque incoraquetajeguete anquejejiaguempari iriatimpa, amenamajajiaqueritarite quero icota. ³Maasano ogujajia-vajirica incoraquetajeguete yovashiantajiaquerotari covaeguisherentsi yantajiavetacaca igantaga icomajamajajiaque, iquejejiacari iriatimpa tee inquempevaetempaji.

⁴Cotanquitsi iriraquea quempevaetsica tee irinetsanatero icantica Aapani

Irioshi, iroguentitarite quempevaerentsi teegueti anetsanateroji icantica. ⁵Imaica atsajiaquequeate irooqueate icoraqueta-shitaquiti Jesoquirishito irishetajajiro-queate aguempveaerejia. Iriatimpa teenicate inquempevaetimatempaji.

⁶Maasano quisho oaquerica Quirishito, tee incovaeguishetanajempaji, cotanquitsi irira covaeguishetanajatsica tee irameneriji, tee intsateriji.

⁷Irijanijia, inchiquiojia yamatavijaji-timpitsi. Irirajia antiroca cameetsa iriguentiqueate cameetsatsica, iquempetacari icameetsatigueti Jesoshi.

⁸Cotanquitsi irira antapinitiroca quempevaerentsi iriguenti ashintari ampatsini. Irira ampatsini igantagatarite iquempevaetaca coramani iroaquera-gueti ipigatsacacari Aapani Irioshi, irooqueate icoraquetashitaquiti Irijanite Aapani Irioshi irovashiantacaantaquero-nijite yantavetacaca ampatsini aatonijite iquemisantajitajiri. ⁹Irirajia irijanintacaca Aapani Irioshi teequeate irantajianajeji teeca oncameetsateji, ichoocashirentaqueritarite Ishire Aapani Irioshi. Ariqueate quero incotaquempa irantaguishejiajeguete, iriguentitari Aapani Irioshi irijanintacarica. ¹⁰Jero itsatantajitacarica queri irijanijiate Aapani Irioshi, aisa queri yashintajiacaca ampatsini. Irira teeca iranteroji cameetsari aisa irira teeca impintsatempariji irapicaquintete teequeate irio ashintemparine Aapani Irioshi.

Ampintsatavacaajiaquempa

¹¹Imaica mana noncantajiaquempi piquemajiaqueca iroaqueraguete icantajique: "Pimpintsatavacaajiguempa." ¹²Aato piquejigari Cainini yashintacariguete ampatsini, irooqueate imetojantacarica iriguentijeguete. ¿Taa imetojimentaqueri? Mana yamena-queri yantaquero cameetsari, iriatimpa

iroguenti yantaque teeca oncameetsateji, irooqueate imetojantacarica.

¹³Napiguemisantarijiate, aato poajianaque intati irisemajiaquempiguete quepatsiquitica. ¹⁴Atsajiaquequea, coramani anajiaque metojagantsiqui, cotanquitsiquea imaica anajiajijianijagantsiqui. Jeroquea atasantajiacaroca: apintsamajiacaritari apiguemisantarijiate. Cotanquitsi maasano teeca impintsatempaji iacacani inajiaque metojagantsiqui. ¹⁵Maasano semajigarica irapicaquintete mana iquejejiacari metojantatsica. Aviatimpajia pitsajiaque irira metojantatsica teequeate irimeshiguempajiqueate ishirequi, teequeate iranijacagueriji ishirequi Aapani Irioshi. ¹⁶Jero atasantajiacaca quero ancojiaquempiani ampintsamajatantajiaquempaguete: irira Jesoquirishito caaviji ipintsamajatacaji imetojavantantajiacajica, ariqueate anquejejiaguempa aatimpajia aato atsaroacagaro ametojavantajiaqueriguete apiguemisantarijiate. ¹⁷Querica ashintaguetanquitsica cotanquitsi aatoguete icavintsajiri irapiguemisantaritene coguitejimotacarica, ¿arimpate ipintsacacari Aapani Irioshi? ¡Teequeate!

¹⁸Irijanijia, aato acantashijigaro intati ancantajiaque: "Nopintsatavacaajiacaca." Oraqueate arimajaguete apintsatavacaajiacaca anigaantajiaqueroqueate. ¹⁹Oraqueate ampintsatavacaajiaquempaguete irooqueate antsatantajiaquemparoca arimaja anetsanajiaquero Quenquetsatsarentsimajaca. Anquejetaquempaguete aatoquea atsaroajigui anquenquetsatacaajiaqueriguete Aapani Irioshi. ²⁰Amenajiaquempaguetequeate chooca aguempveaerejia iriompate Aapani Irioshi caaviji yamenaquero, itsaquerotarite maasano. ²¹Cotanquitsi, nopintsajiacaca, antsaquetiqueate teequeate onchoocateji antaqueca, aatoqueate atsarogui anquen-

quetsatacaajiaquerigueti Aapani Irioshi. ²²Iriatimpa irojocajiacajiro maasano amanajiaquerica anetsanajiaquerogueti icancajica aisa antajiaquerogueti maasano inintaguetica. ²³Jeroquea igantacaantane: aventajiaquempari Irijanite Jesoquirishito, aisa ampintsatavacaajiaquempa anetsanajiaqueroquea icantajiacajica iriatimpa coramani. ²⁴Quericaca netsanamajatiroca icantaguetica Aapani Irioshi itsipamajatacari, aisa iriatimpaquea ichoocashirentaqueri. Atsamajajiaque ichoocashirentajiacaj, itigarancajiacajiritarite Ishire.

**Pintsajigueri maasano
tsatacaajiaquempica**

4 ¹Napiguemisantarijiateni nopintsajiacaca, aato piquemisantajiguiri intati maasano cantajiatistica: “Iriguenti choocashirentaquena Ishire Aapani Irioshi.” Iroquetitaja pamenaque irioca choocashirentaqueri. Itsitacaguitejanacarotarite amataajiatistica. ²Jero pintsatantajiaquemparica ichoocashirentaquea Ishire Aapani Irioshi: maasano cantamajatanquitsica, “Irira Jesoquirishito icoraquetapojaque icaquintetanaque itsinotanaque” iriotaque ichoocashirentaquea Ishire Aapani Irioshi. ³Cotanquitsi maasano teeca inquejigueroji imaica teequeate irio ashintajiguemparine Aapani Irioshi, iriguenti ashintajigari ampatsini catsimataquerica Quirishito. Piquemacojiaqueritarite incoraquetaque, imaicaquea imaica jac coraquetaque.

⁴Irijanijia, aviatimpajia iriguenti ashintajiguimpi Aapani Irioshi aisa ichoocashirentajiaquempi Ishire, irootaquequeate pitampishitashitantajiacarica amataajiatistica querocampate incojiaquempini iramatavijajiaquempigueti, iroorijite Ishire Aapani Irioshi choocashirentajiaquempica yanaaqueri ashintarica itsipajia quepatsiquitica. ⁵Iriatimpajia tee inquemisantajigueriji Aapani Irioshi, irootaquequeate mana iquenquetsatocotantajiacaroca intati inintaguetica caquinte, ariqueate itsipajia teeca intsarorentempariji Aapani Irioshi iquemisantajiaqueri. ⁶Aatimpajia iriguenti ashintajiacaj Aapani Irioshi. Irira tsamajajiguirica iquemisantajiacaj, cotanquitsi irira teeca irashintempariji Aapani Irioshi tee inquemisantajigaji. Irootaquequeate antsatantajiaquemparica queri quenquetsatiroca iroomajatsica aisa queri amataatsica.

**Aapani Irioshi iriguenti
pintsamajatantatsica**

⁷Napiguemisantarijiateni nopintsajiacaca, jame ampintsatavacaajiguempa, aritarite iquejetaca Aapani Irioshi ipintsamajatanta. Maasano pintsatantatsica iriguenti irijanite Aapani Irioshi aisa itsamajajigui. ⁸Cotanquitsi irirajiaqueate teeca impintsatavacaajiguempaji teequeate intsajigueriji. Irira Aapani Irioshi iriguentitarite pintsamajatantatsica. ⁹Iriatimpa itigarancaqueri Irijanite apatirotica acaniqui quepatsiqui irimetojaventajiacaj iranijacaajiajajinjite, irootaquequeate atsatantajiacaca arimaja ipintsamajajiacaj. ¹⁰Jero antsatantaquempaca quero icotani pintsamajatantatsica: aatimpajia teequeate ampintsamajajiguempariji Aapani Irioshi, iriguentiqueate pintsamajatantatsica, ipintsamajajiacajitari itigarancantacarica Irijanite imetojaventajiacaj irishetajajironijite aguempaveerejia aatonijite iquenquejacagajiro Aapani Irioshi coajica.

¹¹Nopintsajiacaca, pitsajiaquequea quero icota Aapani Irioshi ipintsajiacajigueti, aritarite anquejiaquempa aatimpajia aisa ampintsatavacaajiaquempa. ¹²Teequeate irinejajiteriji Aapani Irioshi, cotanquitsi apintsatavacaajiacagueti ichoocashirentajiacaj, ariqueate iragavejacaajiacaj ampintsamajatantajianaquempajini. ¹³Itigarancajiacajiritarite Ishire atsatantajiacaca itsipamajajia-

caji. Ariqueate aquejejiaca aatimpajia atsipamajajiacari. ¹⁴Iriatimpa itigarancaqueri Irijanite irajajateri maasano caquintegueta-tsica. Naatimpajia namenajiaqueriqueate, irootaquequeate notsavetacotantajiacarica. ¹⁵Aapani Irioshi ichoocashirentajiaqueri maasano cantamajajiatsica Jesoshi iriguenti Irijanite Aapani Irioshi. Ariqueate iquejejiaca iriatimpajia ichoocatimojiaqueri. ¹⁶Ariqueate amenamajataque atsajiaque ipintsamajajiacaji Aapani Irioshi. Iriatimpa iriguenti pintsamajatatantsica. Maasano pintsatantsica ichoocatimojiaqueri Aapani Irioshi. Ariqueate iquejetaca iriatimpa ichoocashirentajiaqueri iriatimpajia.

¹⁷Onquejetaquempaguete arimpaqueate ajajiguete ampintsamajatatantajiapojempa aatonijite atsaroajigui oncoramanitapojaguete incantimentajiaqueriguete Aapani Irioshi maasano, iroorijite achoocajiveta-caqueate acaniqui quepatsiqui, cotanquitsi jac aquejejianacari Jesoquirishito. ¹⁸Irira pintsatantatsica tee intsarogueji. Aritarite ampintsamajataquempaguete querocampate antsaroacaguempaca. Ariguete atsaroanaque atsaroacagaro incatsimatimentacajiroguete Aapani Irioshi antaqueca teeca oncameetsateji. Irootaquequea atsatantacaca irira tsaroanquitsica teequea impintsamajatatantempaji.

¹⁹Aatimpajia apintsajiacari Aapani Irioshi, iriquetitarite pintsajiacaji aatimpajia. ²⁰Iriqueate cantavetsica: “Nopintsatacari Aapani Irioshi”, cotanquitsi isemacariaguete irapicaquintete, iriguenti tsojenti. Aatoguete ipintsatari irapicaquintete yamenavetacaca, aato yagaveji ipintsatari Aapani Irioshi teeca

inconijatimoteriji. ²¹Icantajiacajitarite iriatimpa: quericaca pintsamajatarica Aapani Irioshi impintsataquempariqueate aisa irapiguemisanariteni.

**Maasano irijanijiate Aapani Irioshi
yagavejiaque intampishitashijiaquero
teeca oncameetsateji**

5 ¹Irijanintajiacari Aapani Irioshi maasano cantajatsica Jesoshi iriguenti Quirishito Meshiantatsica. Quericaca pintsamajacari Aapani Irioshi ipintsamajajiacari aisa maasano irijanijiate Aapani Irioshi. ²Oraqueate apintsajiacariguete Aapani Irioshi, aisa anetsanajiaquerogueti icantaqueca, atsajiaque apintsamajajiacari irijanijiate. ³Apintsajiacariguete Aapani Irioshi anetsanajiaquero maasano icanqueca, teenicate omanempaji anquemisanquero icancajica. ⁴Maasantarite ivoashirentica Aapani Irioshi yagavejiaque intampishitashijiaquero maasano teeca oncameetsateji choocaguetatsica acaniqui quepatsiqui, iriguentitarite agavejacaajiacajine Quirishito aventajiaquempariguete. ⁵¿Quericanpate agavejanquitsineca intampishitashitaquero choocaguetatsica acaniqui quepatsiqui? Iriguentiqueate cantatsica Jesoshi iriguenti Irijanite Aapani Irioshi. ⁶Iriotarite Jesoquirishito coraquetaquitatsica acaniqui quepatsiqui iviñacajajiqueri ojaaqi, ariqueate imetajajivetacari imocorojajiqueri osotoajatanaque iriraja. Teequeate apaniro iriviñacajajiteriji ojaaqi, aisa imocorojajiqueri osotoajatanaquequea iriraja. Iriguentitarite cantajiacaji Ishire Aapani Irioshi. Iriatimpa teequeate iramatavijanteji. ⁷Choocatarite 3 tsatacaacajica:^b ⁸chooca

b 5.7-8 Yoguipitsocantajitacarogueti coramani ocatica paperi iguenquetsatsarequi Iromaquitica (Latín), yogavijitaquero capichaji teeca ontioncavetempaji iroaqueraguete. Jero ocanqueca gavitanquitsica: “Chooça 3 tsavetacotantanquitsica inquitequi: Aapani, Quenquetsatsarentsi, jeri aisa Ishire. Irica trestanquitsica, aparo inaque.” Yogavijitaquero aisa capichaji otsapa 8, itioncajitaque: “Ari oquejetaca quepatsiqui, chooca 3 tsavetacotantanquitsica.” Irootaquequea itioncantajitacaroca oca iguenquetsatsarequi quimajareri paperiqui icantajitica *La Santa Biblia* versión “Reina Valera”.

Ishire Aapani Irioshi, chooca aisa oja iviñacajatacaantacagueti, jero aisa iriraja imetojaventajiacajigueti. Irica 3 ari iquejeta-vacaaca icantacotaqueri Quirishito.

⁹Arimpate aquemisantajiguero icamantacajica caquinte, iriompate Aapani Irioshi caaviji yanaajiaqueri maasano, arimaja anquemisantamajataquero icamantacajica iriatimpa, itsavetanqueritarite Irijanite.

¹⁰Querica quemisantamajatarica Irijanite Aapani Irioshi itsaue ishiquequi iroomaja icamantacajica, cotanquitsi irira teeca inquemisanteriji Aapani Irioshi quejeveaca manaca icanque Aapani Irioshi iriguenti tsojenti, teenicate inquemisanteriji itsavetan-taquerigueti Irijanite. ¹¹Jero icanqueca itsavetanquerigueti: Aapani Irioshi yojocajiacaji anijagantsi coguitatsineca, oratica anijagantsi ochoocaqueri Irijanite.

¹²Irraquea ichooaqueca Irijanite Aapani Irioshi, ochoocaqueri anijagantsi; iriraquea caarica ichooati Irijanite Aapani Irioshi, tee onchoocateriji anijagantsi.

Icamantajianajiriqueate

¹³Notioncaciaquempi maasano aviatimpajia quemisantajiguirica Irijanite Aapani Irioshi cameetsanijite pintsatimentajiaquenijite yanijacaajia-jimpi pishirequi pincoguitempani pinchoocajiaque. ¹⁴Aatimpajia tee antsaroajigueji amanajiguirigueti Aapani Irioshi, atsajiaquetarite amanajia-querigueti taaca opajita inintaqueca irojocajiacaji, iquemajiacajiqueate.

¹⁵Atsajiaque iquemajiacaji amanajiguiri-gueti, aisa atsajiaque irojocajiacajiro taaca amanajiaqueri.

¹⁶Quericaca amenaquerineca irapigue-misantariteni impeacaguemparogueti coguisherentsi caarica imetojashirentimen-tajitiri, cameetsataque iramanacoventaque-riquea, ariquea iranijashirentacaajeri Aapani Irioshi. Iriguentijia nocantacotaque peacaajigaroca coguisherentsi caarica imetojashirentimentajitiri. Choocaquea coguisherentsi irimetojashirentimentajiteri. Teequea iroguenti noncanteji iramanacoven-te. ¹⁷Maasano ipeacaaguishejitaca iroguenti coguisherentsi, cotanquitsi chooca coguisherentsi caarica imetojashi-rentimentajitiri.

¹⁸Atsajiaquetarite iriraqueate irijanincaca Aapani Irioshi teequeate irantaguishtanajero teeca oncameetsateji, yamijiacajita-rite Irijanite Aapani Irioshi ariqueate tee iragavejajajaji ampatsini inquempevetacaajiajaji. ¹⁹Atsajiaque aisa Iriguenti ashintajia-caji Aapani Irioshi, cotanquitsi maasano teeca inquemisantajigueriji Aapani Irioshi iriguenti ashintari ampatsini, irotaquequeate yagave-jantajiacarica. ²⁰Oraqueate aisa atsajiaque icoraquequiti Irijanite Aapani Irioshi itsatacaajiacaji atsatantajiacarica Iriomajatatsica. Imaica atsipamajajiacari Iriomajata-tsica, atsipamajajiacaritari Irijanite Jesoquirishito. Iriotaque Irioshima-jaca. Iriotaque aisa anijacaajiacajica ancoguitempaniniji anchoocajiaque iriatimpaqui. ²¹Imaica, irijanijia, inchiquiojia pishineventajigaritsi irioshivetatsica. Ari oncoquempa.